

Powšitkowne WOZJEWJENJA

njedźelu, 7. julija 2024

Tomaš Žur koncertuje

We wobłuku Budyskeho pišćeloweho lěča w tachantskej cyrkwi swjateho Pětra koncertuje srjedu, 10. julija, wjelelětny organist Berlinskeje katedrale Tomaš Žur, kotryž z Baćonja pochadza. Zaklinča mjez druhim twórby Johanna Sebastiana Bacha a Jana Janka. Započatk je w 19.30 hodź.

Z busom do Krupki

Na putniku Božu mšu srjedu, 24. julija, w 10.00 hodź. w Krupce pojedže zaso bus. Štóz chcył sobu jěć, měł so w Radworskim Šmitec wozydłownistwje přizjewić, telefonowe čisło (03 59 35) 28 60.

Prózdniške poskitki w Serbskim muzeju

Budyski Serbski muzej ma w lěčnych prózdninach wšelake poskitki za dźěći. Mjez druhim podadza so na „Slědy serbskich bajow“, zaběraja so ze žiwjenjom w měsće přichoda a zhotowja sej mozaikowe wobrazy. Nadrobny přehlad z terminami a dalšimi informacijemi je pod www.posol.de wozjewjeny.

„Nóc tysac swěčkow“

Na zahrodze klóštra Marijineje hwězdy w Pančicach- Kukowje dožiwja wopytowarjo sobotu, 20. julija, wot 19.00 hodź. zaso „Nóc tysac swěčkow“. Hač do zaswěćenja swěčkow poskića pisany program na jewišću.

„Što tam spěwa, lěta, šumi?“

Pod hesłom „Što tam spěwa, lěta, šumi?“ přeprašuje sekcija Swójba Towarstwa Cyrila a Metoda z.t. (TCM) w kooperaciji z Dekanatnym dušepastyrstwom za dźěći na zhromadny dzeń za šulerjow wot 4. do 6. lětnika w Njeswačanskim hrodze, kotryž budže sobotu, 10. awgusta, wot 10.00 do 14.00 hodź. Pod nawodom Madleny Mičkec, projektoweje sobudźělačerki tamnišeje přirodoškitneje stacije, a Guida Budarja, zastojnika w zawodze Sachsenforst, budu so dźěći z Božej stwórbu zaběrać a zeznajomja so z ptačinu kaž tež štomami swojeje domizny. Nimo toho móža ptački picować a sej kukawč natwarić a sej jón sobu domoj wzać. Za wudawki dnja zběraja wot kóždého wobdźělnika přinošk pjeć eurow. Zajimcy měli so online pod www.posol.de přizjewić. Ličba městnow je wobmjezowana. Je-li zajim jara wulki, TCM samsne zarjadowanje na dalším terminje wospjetuje.

Młodźina do Schmiedeberga!

Kubłanske dny serbskeje młodžiny wotměja so wot pjatka do njedzele, 27. do 29. septembra, w ponowjenym Schmiedebergskim Winfriedowym domje. Wobdźělnicy změja skladnosć po přirodze pućować, so zhromadnje modlić a spěwać a so duchownje posyljeć. Zajimcy měli so hač do pónđzele, 29. julija, online přizjewić. Link nańdu pod www.posol.de.

Wulět dekanatneje młodžiny

Wulět dekanatneje młodžiny budže sobotu, 24. awgusta. Přeprošeni su młodostni wot přichodneho 9. lětnika kaž tež młodži dorosćeni. Přizjewjenja přijimuju hač do srjedy, 7. awgusta, na internetowej stronje Worklečanskeho dekanatneho dušepastyrstwa za młodžinu. Link je pod www.posol.de podaty.

Młodžina do Wechselburga!

Pod hesłom „Kreuz und quer“ su młodostni na diecezanske zetkanje młodžiny do Wechselburga přeprošeni. Wone wotměje so pjatk a sobotu, 13. a 14. septembra, w tamnišim klóštrje. Serbscy wobdźělnicy móža sej tam zhromadnje dojeć. Přizjewjenja přijimuje dekanatne dušepastyrstwo za młodžinu we Worklecach, a to hač do soboty, 24. awgusta. Link k tomu kaž tež z dalšimi informacijemi je pod www.posol.de podaty.

Dworowy swjedzeń w Hrubjelčicach

Serbske ewangelske towarstwo a Maćijec swójba přeprošujetej wšitkich Serbow a dalšich zajimcow na lětnje pućowanje a serbski swjedzeń. Započatk je sobotu, 10. awgusta, w 14.00 hodž. na Jaworkec/Maćijec dworje w Hrubjelčicach, Čěchorčanska 16. Wottam podadza so wobdźělnicy a pućowanje do wokoliny. Po swačinje na dworje přizamknjetej so tam w 17.00 hodž. serbska ekumeniska nutrnosť z dekanom Witom Šćapanom a Serbskim superintendentom Krystofom Rummelom kaž tež program ze skupinu Šwintuchi. W bróžni budže bifej z jěždžemi přihotowany. Přeprošeni su tež wšitcy, kotřiž chcedza hakle na nutrnosť abo program přińć. Při sylnym dešču započnje so swjedzeń hakle w 17.00 hodž. w Maćijec bróžni.